

圓悟佛果禪師語錄卷第十

惠三

宋平江府虎丘山門人紹隆等編

住成都府天寧寺小叅師示衆云正令已行
十方坐斷千聖出來亡鋒結舌雖然如是事
無一向還有同生同死底衲僧麼時有僧問
勿謂無心便是道無心猶隔一重關如何是
一重關師云十重也有進云如何是關中主
師云放過一著進云作何面目師便喝師乃
云只恁麼早多事也如今直饒舉一則語盡
古今言教一時明得正是和泥合水拈一件

物盡大地一時見透亦是好肉上剜瘡看他
從上得底人口如臘月扇直得醭生心如枯
木縱逢春夏未曾變動不是強爲任運如此
豈要你舉古明今拋沙撒土今夜事不獲已
將錯就錯與諸人打葛藤去也還知此事麼
盡十方界窮虛空際無絲毫透漏是箇金剛
眼睛更無外物所以尋常與兄弟道你纔觀
色早塞却眼纔聽聲早塞却耳纔嗅香早塞
却鼻纔吐氣早塞咽喉纔動轉早塞却身纔
起念早塞却意六根門頭淨裸裸赤灑灑只

是不肯回光返照看他古人於先德言下契證通箇消息也不妨親切水潦被馬祖一踏起來呵呵大笑云百千法門無量妙義只向一毫頭上識得根源去豈不快哉臨濟在黃檗三度設問喫六十棒及至大愚面前不覺道元來黃檗佛法無多子似此得處豈不驚群諸公還曾消息麼若也翻覆叅詳實是得箇入處始知二六時中行住坐卧動轉施爲一一超古越今無間無斷與他從上祖佛把手共行尋常只守閑閑地不起毫髮凡聖情

量更有什麼得失可疑生死可出似此說話可謂對諸公面前無夢說夢無事生事忽有箇忍俊不禁出來喝散大眾拽下繩床痛打一頓也惟他不得然雖如是也須是實到這箇田地始得如今還有恁麼人麼山僧甘喫惠三一頓且要與此人相見有麼有麼如無山僧今夜失利

示衆云祖師心印直截當機凜若劍鋒明如皎日當臺輝赫縱爾現前還有互相平展底麼僧問世尊久默斯要及至末後爲什麼獨

召飲光密傳法眼師云正是龍頭蛇尾進云
一點水墨兩處成龍師云帶累山僧進云苦
瓠連根苦甜瓜徹蒂甜師云灼然進云也是
烏龜喫生菜師云取性乃云欲知佛性義當
觀時節因緣時節若至其理自彰苟或時節
未至理地未明便乃業識茫茫無本可據敢
問諸公即今是什麼時節莫是黃昏時節麼
莫是小叅時節麼莫是坐立儼然時節麼莫
是說禪說道時節麼莫是萬像交叅時節麼
莫是心境一如時節麼若與麼儻侗且喜沒

交涉今夜諸公在此攢立片時山僧不惜眉
毛確實評論這一段時節去也只如諸人在
此聽山僧鼓兩片皮用作時節正墮常情須
知山僧不曾說一字諸人不曾聞一言諸人
與山僧各各有一段大事輝騰今古迥絕知
見淨裸裸赤灑灑各不相知各不相到透聲
透色超佛越祖若能退步就已脫却情塵意
想記持分別路布言詮聞見覺知是非得失
直下豁然瞥地便與古佛同一知見同一語
言同一手作同一體相非唯與諸聖同亦乃

與歷代宗師天下老和尚同下至四生六道
醯鷄蟻蠓無不皆同不被前塵所惑知解所
撓不畏生死不愛涅槃放曠平常隨時任運
動靜施爲無非解脫能轉一切境界能使一
切語言非唯諸人分上如此至於古人無不
皆由此箇時節得入豈不見趙州初參南泉
悟平常心是道後來有問西來意便對道庭
前柏樹子以至鎮州出大蘿蔔頭我在青州
作一領布衫重七斤非唯趙州德山得此時
節入門便打臨濟得此時節入門便喝睦州

得此時節便道現成公案放你三十棒俱抵
一指頭上用此時節鳥窠吹布毛處見此時
節以要言之古來宗師無不皆用此箇時節
只如法眼曾舉叅同契云竺土大仙心遂云
無過此語也向下中間也只是應時應節說
話至最後謹白叅玄人光陰莫虛度乃云住
住恩大難酬設使粉骨碎身亦報此恩不得
豈不是知此時節方恁麼說如今若未有發
明處去只虛度光陰若叅得徹底分明去二
六時中管取無絲毫許落虛非唯二六時中

下至百千億劫盡未來際悉不落虛只如山
僧說恁麼時節還得諦當也未復云夢也未
曾夢見在且道還有爲人處也無若善叅詳
只這一句亦不虛設有箇山頌舉似大衆秋
深天氣爽萬象共沉沉月瑩池塘靜風清松
檜陰頭頭非外物卷三一一本來心直下便薦取
切莫更沉吟

示衆云當軒有路直下坦平慣戰作家便請
單刀直入有麼有麼良久云諸人既是藏鋒
山僧不免作一場獨弄雜劇去也未恁麼前

是第二頭正恁麼時是第三首餉問恁麼去
只是隨波逐浪如今且向隨波逐浪處與諸
人商量還蓋覆得麼還有一法與他爲伴侶
麼所以道他能成就一切法能出生一切法
一切諸佛依之出世一切有情因他建立六
道四生以他爲本只如諸人即今在此坐立
悉皆在他光中顯現還見得他麼若也見得
直下無一絲髮隔礙無一絲髮道理更有付
麼見聞覺知爲緣爲對但恐自家不能返照
所以生疑尋常不是向諸人道千言萬言但

只識取一言千句萬句但只識取一句千法
萬法但只識取一法識得一萬事畢透得一
無阻隔直下脫却情塵意想放教身心空勞
勞地於一切時遇茶喫茶遇飯喫飯天但喚
作天地但喚作地露柱但喚作露柱燈籠但
喚作燈籠一切亦然二六時中只麼平常無
一星事雖然如是若有箇無事懷在胸中亦
未得自在有箇有事亦未得自在直須有事
也無無事也無無二亦無猶在半途若是聊
聞舉著入骨入髓信得及底人聞恁麼說話

大似熱碗鳴聲尋常間說箇禪字便去河邊
洗耳等閑地不著便偶然道著箇佛字也須
漱口三日寧可生身入地獄永劫受沉輪向
鏝湯鑪炭裏煮爍終不肯將佛法作解會亦
終不起佛見法見佛見法見尚自不起何況
更起世間情想分別妄緣諸業且作麼生見
得此人作麼生親近得此人有具眼底麼出
來道看如無待三二十年後山僧換却骨頭
別與諸公通箇消息
示衆云大道本來無向背擬心湊泊已差池

吒呀卓朔能呀吼即是金毛師子兒還有恁麼底出衆相見僧問如何是定乾坤句師云唯我獨尊進云橫身當宇宙去也師云好與三十棒僧云便請師云許你大膽進云是何言歟師云真待雨淋頭便打乃云朕兆未分已成露布言詮纔立特地乖張雖然第二義門且不是和泥合水大衆還知此事麼坐斷千差路不立一纖塵巍巍堂堂曄曄曄曄蓋天蓋地應聲應色不與千聖同途不與萬法爲侶卷舒自在無執無拘若也見得可以向

百草頭上縱橫聲色堆裏坐卧言詮莫能及比况莫能得知不可知識不可識不是心不是佛不是物不是聖不是凡不是有不是無不是是不是非不是得不是失恁麼也不得不恁麼也不得到這裏如何稱提如何舉唱聖山僧直得口似匾擔無理可伸無詞可說然雖如是官不容針私通車馬放一線道有箇商量豎起拳云還見麼諸佛以之出世祖師以之西來歷代宗師以之接物利生天下老師以之鉗鍵衲子其把定也乾坤失色日月

無光盡大地人喪身失命其放行也巖谷生
光森羅顯煥隨長隨短隨有隨無處處皆真
頭頭露現且道把住好放行好三十年後逢
人不得錯舉

示衆云獨棹扁舟泛五湖鉤頭時復得嘉魚
如今四海清如鏡還有金鱗上釣無負命者
出衆相見僧問過去佛也恁麼見在佛也恁
麼未來佛也恁麼未審和尚如何師云恁麼
是箇什麼僧云正是恁麼師云蝦跳不出斗
進云請和尚道出斗底句師云扁舟已過洞

庭湖乃云動則影現覺則永生不動不覺死
水裏平沉既動既覺未免傷鋒犯手到這裏
且作麼生舉唱且作麼生爲人然雖如是盡
法無民古者道這一片田地分付來多時也
我立地待你搆去還知落處麼東三威音已前空
劫那畔這一片田地巍然不動及乎四生浩
浩萬象騰騰世界遷流死生變化這一片田
地亦巍然不動以至三灾劫壞毗嵐風起吹
散大地猶如微塵這一片田地亦巍然不動
諸佛出世祖師西來正爲發明這一片田地

從上宗師天下老宿千方百計施設方便無不盡力提持這一片田地雖然如是終未有人解當頭道著還搆得麼八面坦平四方清肅萬法不能盡覆千聖不敢當前若搆得去了一切了一成一切成一見一切見一得一切得所以道一塵纔舉大地全收一毛頭師子百億毛頭一時現但爲妄情執著無透脫期甘處凡流不能徑截苟或放得下無一法當情無一物附心蕩蕩無拘自然如水土按葫蘆相似觸著便轉捺著便動拘牽不回

惹絆不得動靜語默蓋天蓋地明眼漢沒窠臼却物爲上逐物爲下若論戰也箇箇力在轉處更有什麼高低可疑是非可畏上門上戶咬人火急豈不是英靈特達底漢衆中還有恁麼底麼出來證據令人長憶李將軍萬里天邊飛一鷲

示衆云道無方所明之在人法離見聞斷之在智若能頓捨從來妄想執著於一念頃頓悟自心頓明自性不染諸塵不落有無自然法法成見然雖此事不可造次領會須是發

大丈夫慷慨特達之志不顧危亡不拘得失
存箇長久鐵石身心逢境遇緣不變不異時
時著眼體究不論歲月以悟為期祖師門下
不比教家只要直截根源於一言下領取與
諸聖同體同用大解脫任運施為無不見性

惠三

至於雜亂狂慧思量分別有一絲毫斬不斷
則無趣入之期教中尚道是法非思量分別
之所能解又云以有思惟心測度如來圓覺
境界如取螢火燒須彌山終不能著祖師道
但盡凡情別無聖量凡情盡處聖量見前直

須頭歇妄緣無念無為放教虛靜千聖萬聖
未有不從此門而得入者只在存誠堅固努
力向前但辦肯心必不相賺环重

示衆云大凡學道須是用作事始得莫只等
閑但二六時中如欠却人家二三百萬貫債
負憂怕還他不徹如此存誠不憂不到是故
古者道大事未辦如喪考妣又有一喻學道
之士如鷄抱卵須是暖氣相接方可生成若
中間間隔暖氣不接便抱十年終不得生龍
牙亦云學道如鑽火逢烟未可休直待金星

現燒燃始到頭況此大事三世諸佛爲之出世自己透脫生死豈可因循如存若亡却請努力向前以悟爲則各希取信珍重

示衆云具足凡夫法凡夫不知具足聖人法聖人不會聖人若會即是凡夫凡夫若知即

卷三

九

是聖人此事一語兩當還委悉麼要識聖人凡夫凡夫聖人長者長法身短者短法身大小青黃一切法悉皆如如渾是箇大解脫門更無別異但得情亡意遣一念真正隨處遇緣皆爲妙用所以古人道處處真處處真塵

塵盡是本來人真實說時聲不見正體堂堂沒却身至於天堂地獄草芥人畜六類四生纖洪近遠無不皆真但爲未徹根源底居常生心動念皆在塵勞業識中流轉未曾回光返照所以枉受輪迴不得受用若能發慷慨心啓特達志頻歇諸緣直下了得徹底分明心地了了可謂行亦禪坐亦禪語默動靜皆爲正體是故雲門道和尚子莫妄想山是山水是水僧是僧俗是俗又道見拄杖子但喚作拄杖子見屋但喚作屋謂之覲體全真有

般人取一邊捨一邊見處偏枯不能著實便
乃得失居懷被物所轉無自由分看他從上
古人得大受用利物垂慈全身擔荷或出或
沒或隱或顯或順或逆開建化門示徑截路
無不教人究本明宗離諸執著豈不見稜道
者叅雪峯靈雲玄沙來往十五年坐破七箇
蒲團念茲在茲後因捲簾忽然大悟有頌云
也大差也大差捲起簾來見天下有人問我
意何如拈取拂子劈口打及乎住長慶示衆
云撞著道伴交肩過一生叅學事畢似此稱

提若不知有爭解恁麼道可謂從自己曾襟
流出蓋天蓋地又有問如何是合聖之言對
云大小長慶被關黎一問直得口似匾擔若
善叅詳可以丹霄獨步自在縱橫大衆還知
落處麼若也未知爲諸人拈出白雲盡處是

第三

+

青山行人更在青山外

示衆云德山小叅不答話打鎖敲枷趙州小
叅要答話將杖探水崇寧今夜也不管答話
亦不管不答話偶然向衣單下拾得箇千年
桃核舉似大衆乃橫拄杖云爾諸人若也恁

麼坐斷天下人舌頭復以往杖卓地云爾諸人若也恁麼入地獄如箭射且道利害在什麼處若不同牀卧焉知被底穿

夾山寺入院小叅師云收光攝彩信天真事事圓成物物新內既無心外無相更於何處見通津還有透得趙州關底麼試出衆相見問承師有言透得趙州關如何是夾山關師云退身三百步進云恁麼則九天雲靜鶴飛高師云豈干闍黎事進云共相證據也何妨師云持鉢作啞師乃云牛頭沒馬頭回金影

照用金烏急玉兔速略露權衡透得過底似虎靠山如龍得水透不過底聞恁麼道似鴨聽雷鳴蓋未諳悉元由一向情存知解山僧今夜向作家面前不惜眉毛放行去也但能上無攀仰下絕己躬外不見大地山河內不立聞見覺知直下擺脫情識一念不生證本地風光見本來面目然後山是山水是水僧是僧俗是俗雖然莫錯認定盤星更須知有解黏去縛向上機關始得且道作麼生是向上事鵬弓已掛狼烟息萬里歌謠賀太平

結夏小叅師云大衆見成公案觸處圓成雖然老病躡鐘尚可開旗展陣還有匹馬單鎗久戰沙場底麼出來相共證據僧問九旬禁足三月護生只如華猫取斷南泉分身兩段斑蛇適會赤眼就地一鋤未審是持是犯師云破戒也不知進云大用不拘今古楷摸師云依舊分身兩段進云若然者王筋撐開虎眼睛金鞭擊斷那吒臂師云你向什麼處見南泉歸宗進云只在目前師云重言不當吃問西天以蠟人爲驗未審此間以何爲驗師

云以眉毛爲驗進云還許學人出得麼師云更眨上看進云只恐覷不著師云短底短長底長有什麼覷不著師乃云全提單拈斬釘截鐵呵佛罵祖大用大機猶未稱衲僧本分事何況立問立答立賓立主涉語涉言說玄說妙無事生事平地上起波瀾雖然如是事無一向理出多途雖然看風使帆不免相席打令豈不見古人道欲識佛性義當觀時節因緣時節若至其理自彰只如今夜與明朝乃是二千年前釋迦老子立起摸範九旬禁

足三月護生時節天下叢林悉皆依稟既是此箇時節到來還有識得此理底麼若識得此理去隨處作主遇緣即宗二六時中無內無外無得無失全體恁麼亦無生可護亦無蠟人可持其或未然應憐憫護雪直使蠟人

卷三

十三

永師復云大衆釋迦老子道以大圓覺爲我如監身心安居平等性智諸人既欲安居還識得平等性智麼若識得去人人具足箇箇圓成乃至動靜施爲悉皆在大伽藍中與他諸聖把手共行與他諸聖同作佛事且作麼

生識得去三條椽下七尺單前各宜照管又立

結制小叅僧問護生須是殺殺盡始安居未審殺箇什麼師云大有人疑著進云學人到這裏直得步步絕行蹤時如何師云未有金剛王寶劍在進云斬釘截鐵本分宗師朕兆未分請師速道師云咭嚟舌頭三千里進云思深轉無語懷抱自分明師云具莫詐明願問一大藏教是拭不淨紙只如德山爲什麼擔疏鈔行脚師云放下著進云周金剛被婆

子一問直得亡鋒結舌又作麼生師云腦後
拔箭師乃云絕彼我混虛空透聲色無面目
終日喫飯不曾嚼一粒米終日著衣未嘗掛
一縷絲總虛空華藏刹海列向下風過現未
來諸聖倒退千里舉一步越不可說世界向
香水海那邊猶有去處拈一塵混一切無量
無數十方上下一切諸佛祖師七穿八穴猶
有餘地且道此人向什麼處安居向什麼處
禁足若知此人落處始知本地風光始見本
來面目便能攝順逆於一塵中規行矩步現

威儀於一念頃不越常程至於以大圓覺爲
我伽藍猶是小段在若能恁麼見恁麼用恁
麼信恁麼透管取無邊刹海自他不隔於毫
端十世古今始終不移於當念九旬禁足三
月護生於一念一步一塵一芥中見成受用
且道此人畢竟在什麼處還委悉麼披蓑側
立千峯外引水澆蔬五老前
解制小叅師云收因結果慎末護初一段因
緣此時周備聖賢窠窟生死根株一鎚擊碎
一刀截斷若是通方作者舉著知歸後進初

機如何湊泊祇如生佛未分空劫已前威音王那邊還有結制解制也無雖然到這裏直饒千聖出頭來也須目瞪口呆那邊即且致只如今燈燭交光坐立儼然高者是天厚者是地山是山水是水有是有無是無長是長短是短正當恁麼時與威音王已前空劫那時是同是別若向箇裏個儻分明目前無法胃中無心上不見諸聖下不見凡夫外不見一切境界內不見眼耳鼻舌身意便能通同一切說什麼結制解制一鎚擊碎聖賢窠窟

一刀截斷生死根株設使臨濟德山文殊普賢乃至無量無邊具大解脫有大威神無數河沙浩浩地來不消一捏且憑箇什麼若不藍田射石虎幾乎誤殺李將軍

郡中出隊衆請小叅師云蘭城道友集如雲

卷三

十四

選佛場開不二門光飾碧巖無舌老小叅佳會四方聞聞者爭如見底見底爭如激揚酬唱底還有作家禪客麼僧問三世諸佛只言自知歷代祖師全提不起一大藏教詮註不及未審和尚如何師云夾山到這裏口似匾

檐進云捉敗這老漢師云且喜沒交涉進云
恁麼則天下人鼻孔被和尚穿却了也師云
你且道夾山鼻孔在什麼處僧便喝師云也
須穿却進云明眼宗師天然有在師云猶是
落二落三師乃云開佛祖鑪鞴用向上鉗鎚
擬議不來則千里萬里當鋒薦得則坐斷要
津此猶是化門之說若確實而論山僧有口
無說處諸人有耳無側聆處乃至日月未足
爲明虛空未足爲廣乾坤未足爲大萬象未
足爲衆到這裏一搓一捺一挨一撈要見本

分事且問如何是本分事大千沙界海中漚
一切聖賢如電拂

師示衆云舉不顧即差互擬思量何劫悟且
道舉箇什麼直饒解顧也是方木逗圓孔何
況更涉思量計較道理轉沒交涉著實而論

卷三

十五

有什麼事直下無一絲毫事亦無一絲毫見
聞玄妙道理得失到這裏便是千聖出來要
舉揚也無下口處要作用亦無動轉處所以
雲門云向你道直下無事早是相埋沒了也
且道什麼處是埋沒處灼然能有幾人到此

此是文殊普賢大人境界豈是尋常涉道理
計校得失思量底還知麼須是絕情識絕玄
妙千聖只言自知亦無窠臼照用淨躲躲亦
灑灑巖頭道只露目前些子如擊石火此是
向上人行履若覩不見切不得疑著若無恁
麼事遠磨西來經六百年亦不傳至今日爲
有恁麼事至今天下列刹相望一一真善知
識踞師子座各各爲人天師牙如利劍口似
血盆其餘有窠臼有依倚黏皮著骨有得有
失有傳授盡打入弄泥團處去若是石頭馬

師百丈黃檗臨濟雲門玄沙巖頭法眼滿仰
曹洞此等之流皆是向上宗師動靜施爲皆
在此中行履譬如師子捉象皆全其力至於
捉兔亦全其力如僧問雲居弘覺師子捉兔
捉象亦全其力未審全什麼力雲居云不欺
之力要須一一與他本分草料且那箇是本
分草料豈不見長沙道我若一向舉揚宗敎
法堂前須草深一丈事不獲已向你道盡大
地是般若光光未發時無佛無衆生消息向
什麼處得來恁麼說話早是葛藤了也所以

尋常向兄弟道須是打疊情塵得失計較淨盡驀地一場汗出自然活潑潑天下人不奈何幸有如是威風有如是自在若隨人脚跟轉見人涎唾喫則沒交涉且如仰山問同叅道近日見處如何對曰實無一法可當情山

夏三

十六

云師弟解猶在境問何故仰山云汝豈無能知一法可當情者他直得無一法可當情尚遭仰山點檢到這裏無能所知無一法無無一法也須是箇人始得所以喚作無事人方始說本來無事既是本來無事只如目前萬

境縱然六凡四聖那裏得來直須超達始得且作麼生是超達底句莫恠從前多意氣他家曾踏上頭關

道林寺解夏小叅示衆云涼夜群動寂禪庭正清虛明月印空闊白雲任卷舒當陽好定奪還有作家無僧問一塵舉大地收一葉落天下秋衲僧分上成得箇什麼師云前不迭村後不迭店進云大小道林話頭也不識師云切忌虛空裏鷗啄進云和尚恁麼道那師云作麼生是你著實處僧擬進語師云了進

云爭奈落霞與孤鶩齊飛秋水共長天一色
師云賊過後張弓師乃云於內無心於外無
相於上無佛祖可仰於下無衆生可悲慳貪
嫉妬俱除慈悲喜捨併却兩頭坐斷中道不
拘淨裸裸絕承當赤灑灑無回互擊之不濁
揚之不清撥之不動攪之不轉直下坐斷萬
法頭上孤危不立於此安居隨處解脫更說
什麼長期百二十中期百日下午期八十日且
功成一句作麼生道不憐鵝護雪且喜鸞人
冰

惠三

上

冬夜小叅師云佛祖大機人天正眼昧兆未分
時無許多事及至一氣已分便有生住異滅
春夏秋冬若隨波逐浪去種種建立觸處圓
融若截斷衆流去把住要津不通凡聖若也
二途不涉脚跟下灑灑落落豈不是本分衲
僧且道無陰陽地上如何通信直待明年三
月盡莫言冬後雪霜寒
小叅僧問猿抱子歸青嶂後鳥啣花落碧巖
前此是和尚舊時安身立命處如何是道林
境師云寺門高開洞庭野殿脚挿入赤沙湖

進云如何是境中人師云僧寶人人滄海珠
進云此是杜工部底作麼生是和尚底師云
且莫亂統進云如何是奪人不奪境師云山
僧有眼不會見進云如何是奪境不奪人師
云闍黎問得自然親進云如何是人境俱奪
師云收進云如何是人境俱不奪師云放進
云人境已蒙師指示向上還有事也無師云
不可土上更加泥師乃云恁麼恁麼如虎帶
角不恁麼不恁麼似兔無角恁麼又卻不恁
麼暗隔兩重關不恁麼又卻恁麼全行向上

路此四句若排著四邊則爲禍爲祟若一時
割斷則爲祥爲瑞何故他從上來本無許多
事只爲群機有利鈍所悟有淺深是故勞他
諸聖出來應物現形隨機逗教便有權有實
有照有用有殺有活有賓有主有問有答萬
別千差只如正當恁麼時可中若有箇漢牙
如劍樹口似血盆一棒打不回頭出來掀翻
露布截斷葛藤天是天地是地山是山水是
水長是長短是短方是方圓是圓一絲毫不
得動著直下承當便能丹霄獨步與他諸聖

卷三

十八

把手共行有佛世界互爲賓主接物利生無
佛世界風颯颯地坐斷要津不通凡聖然雖
恁麼若是於中端的恁麼來底且道與他作
麼生商量待老僧上山斫棒來

小叅僧問玄沙不過嶺保壽不渡河未審意
旨如何師云直超物外進云雪峯三度到投
子九度上洞山是同是別師云別是一家春
進云恁麼則春色無高下華枝自短長師云
一任卜度師乃云大道坦然更無回互同證
者識同道者知若有實法繫綴羅籠人入地

獄如箭射所以諸佛出世祖師西來實無一
法與人只要諸人休歇若實到休歇田地二
六時中如天普蓋似地普擎更不剩一絲毫
亦不欠一絲毫淨裸裸赤灑灑見成公案若
更躊躇四顧說有說無論得論失有會有不
會息三有得有不得落二落三去也十九所以上古尊
宿天下老和尚拂子邊拄杖頭現無量神通
其實與你諸人解黏去縛拍釘拔楔令汝直
下到安閑之地也無證也無得亦無周由者
也七十三八十四若也未到不免捺糊去也

一切境界一切有無一切法門但於一言下一念頃脫得情塵去塵塵剎剎廓周沙界大小長短方圓青黃赤白全是本心於見處淨裸裸於聞處八面玲瓏無得失是非無長短好惡山是山水是水僧是僧俗是俗無異無別若能實頭到這箇田地離情塵絕路布不落勝妙更須知有一塵中含一切境界一切境界入一塵中悉皆含攝於一毫端現無邊刹海直得恁麼更須知有大用現前時節始得且作麼生是大用現前底時節畢竟水須

朝海去到頭雲定覓山歸
冬夜小參有作思惟從有心起一輪生滅行無間道修無漏業萬古超然拈一放一半開半合未免在窠窟裏殊不知徃復無間動靜一如融大千沙界於一塵會十世古今於一念去來起滅甚處安排春夏秋冬如何理論到這裏淨裸裸赤灑灑沒可把東西不辨高下不分底則故是未知落處久參先德腳踏實地且道正當恁麼時如何還委恁麼群陰消剥盡來日是書雲

除夜小叅樹凋葉落瓦解冰消歲暮年窮家
殘戶破以世諦觀之是不稱意境界以道眼
觀之却是好箇消息豈不見香嚴道去年貧
未是貧今年貧始是貧去年貧有卓錫之地
今年貧錫也無^意早又有古德道富實即易^{二十}
窮即難本分人打得徹信得及見得透物物
頭頭俱為妙用塵塵刹刹悉是真乘若便焦
瘁歇去敢保老兄未徹在那堪更說漸說頓
說玄說妙說理說事却須放却玄妙放却理
性打破向上向下截斷佛印祖機直得東西

不辨南北不分懔懔矍矍遇飯喫飯不知是
飯遇茶喫茶不知是茶到這裏猶只得箇衲
僧門下潔白露淨底是故洞山道見佛與祖
是生冤家始有叅學分正當恁麼時全體現
成佛界不收魔界不管且道向什麼處行履
若識得去便成年窮歲盡相續不斷相續不
斷歲盡年窮正當恁麼時一句作麼生道今
歲今宵盡來年來日新
解夏小叅云年豐歲稔道泰時清唱太平歌
樂無為化護生既滿蠟人愈冰秋色澄澄金

風拂拂正當恁麼時說什麼釋迦彌勒文殊
 普賢德山臨濟向上向下有事事無事直下一
 時坐斷直得風颭颭地人人分上壁立千仞
 各各面前飛大寶光且不落黃緣一句作麼
 生道麓峯頭倒卓石笋暗抽枝

惠三

三十一

圓悟佛果禪師語錄卷第十

音釋

剋烏歎切 醺普木切 潦魯骨切 縱七容切 瓢
 胡故切 蟻蟻蟻結小飛蟲也 蟻蟻蟻結小飛蟲也 煤土洽切
 鍵巨偃切 嵐盧合切 鶚逆各切 鵠丁聊切 躡容
 漆切 踈鍾 縷隴 主切 瞪澄應切 呿丘加切 侗
 儻侗他歷切 儻儻卓異也 儻儻也 鑪鑪龍却切 鑪鑪火
 幸囊 鯨鯨北末切 鯨鯨貌 鵠鵠物曰鵠 崇神祠也
 劃忽麥切 颯風聲也 蒙蒙母總切 瞳瞳正
 懂不麓切 麓谷